



阿姆个心事 (南四縣腔)

有人講：「上帝無辦法照顧每一個人，故所創造阿姆。」這句話，真實講出阿姆个重要。阿姆，係恩兜一生人最重要个貴人。人講：「有阿姆个細人仔係寶，無阿姆个細人仔係草」，毋管你幾多歲數，阿姆係還健，伊都看你係細人仔樣仔來照顧你。

佢个老公五十零歲仔，每禮拜歸去遠厥姆，拜日歸來，定著帶等厥姆包好个三隻飯包歸來：一隻分俵仔第二日上班帶，二隻分兩隻孫仔食宵夜。攞著重沉沉个便當，想著會八十歲个家娘，為著俵仔、孫仔在灶下湯湯洗洗、擦等鑊鏟淬淬汙汙，實在蓋感心，想著世間項每一個阿姆對細人仔永生人个愛心，目汁都會跌下來。佢自家也係做人个阿姆，正有恁深个感想，世間最大个愛，就係「阿姆个愛」呀！這下个心情，大體每一個做過哀仔个人都會有共樣个感想。

【細人仔永遠个保護神】

佢在麵包店認真擇麵包个時節，後背聽著：「你愛食麼个，你就夾起來放在盤仔肚哇！」正注意到左片有一個細細个細俵仔在該問厥姆。聲音聽起來盡幼盡良，佢馬上斷定這个婦人家定著係細俵仔个阿姆。佢翻頭看這個阿姆，續分伊著个衫褲嚇著。熱到會死个天，伊著等長袖同長褲，外背還加一領長袂仔，像齋姑齋嫲頭那毛剃淨淨个頭那頂上，戴等一頂膨線帽，兩片嘴角脣烏烙烏烙，面頰卵七燥殼燥殼，瘦夾夾个身仔，行路同水項分風吹來吹去个紙船仔共樣無力。「係正在該做治療个癌症病人無？」佢心肚一下仔就想著這个问题，無成為著毋分俵仔餓著，拖著弱弱个身體也愛跣伊出來買麵包？實在分人盡感心！不過佢也知，假使係伸半條命，伊一定還係掛心細人仔同家庭，毋係伊毋肯休養，毋知病症个嚴重，一種天生个母愛，犧牲自家也愛照顧大細。

共下上班个同事个細人仔，腳橫斷了，細人仔个教室在三樓，這恁多日，看伊背上背下，仰般食力都無要緊，細人仔个腳搶快好過重要。學生仔病好了來上課也會同佢講，阿姆為著照顧伊，暗晡頭毋敢睡，伊病好了，就換厥姆發病仔。佢講：「係呀！你看若姆恁惜你！」伊盡暢，笑微微仔。

佢攞大俵仔个時節，因為子宮肚个瘤仔十分大，細人仔無法渡大，行路肚屎又會痛，就請假一年倒床休養。這段期間，有幾擺細人仔差一息溜忒；又有一擺照超音波檢查，先生講尋毋到心臟，細人仔驚怕無效了；八隻月个時節，先生又看著細人仔無過大，想愛早啊來剖肚屎，佢愁到幾下暗晡無睡。在該毋知愛仰結煞个時節，佢求神明仔，細人仔係分佢順序降出來，佢會長年食早齋，初一十五也會食！望到愛降了，大俵仔細罔細，好在順

序降出來了，2125公克个重兩，佢毋敢望多，也無嫌伊芮芮仔，正常就好！大隻个今十過歲了，生來已高大，佢也食了十過年齋到今。

每一個做阿姆个人，都甘願為著子女「犧牲奉獻」、「做牛做馬」，希望伊等平安快樂，有一日做出大事業「光宗耀祖」，一時个苦，算得麼个！阿姆就係細人仔永生人个保護神啊！

【享受「拳打腳踢」个日仔】

看到這個標頭，盡多人可能嚇著一下——「享受『拳打腳踢』??」眼珠擘啊同牛眼仔恁大粒，緊看佢——「你盡好分人打喔?」、「麼人對你『拳打腳踢』呢?」後背這句話就問著了!

佢降个兩隻細鱸鰻，每日無到睡目毋會收棚，天光搞到暗，麼个都搬得出來搞，麼个都想得著搞，搞歸日都毋會瘡个細猴仔。屋下一哪仔都擲揪著細人仔搞个東西、故事書、錄音帶，同幼稚園帶歸來做个美術。伊等愛麼个，就搞麼个，愛走了，搞个東西就帶等仔走，到尾，就擲到哪都係。兩兄弟係在屋下，毋單淨東西這擲該擲，還磬跟磬隆，吵到分人覺著在該打雷公，故所，伊等在哪，在該搞麼个，佢毋使看、毋使聽都知。

伊等搞坐火車過山洞，毋知哪尋著恁多番鹼盒仔，擺呀一節一節，手扭著火車頭彎彎幹幹，嘴項就「伊伊喔喔」緊喊；無就學樹林肚个猴仔、象仔、獅仔、老虎、蛇哥、鳥仔這兜頭牲仔走相逐；係無就擎銃仔學阿兵哥相戰，跳上跌落，這屏該屏，這砰該砰，聲色當靚，當像看電影樣仔，分人打著了，還會「啊……」喊啊盡大聲，正橫下來發死。閒閒看伊等搞，實在盡趣妙，無想著恁細个細人仔花草恁多，頭腦恁好，麼个都學个著搞，實在真天才。看伊等搞哇恁大聲、恁暢，無吵著隔壁鄰舍，無攏人就好了!

暗仔，芮芮个身仔軟 怠怠仔眠那眠床頂，仰仔喊、仰仔徙、仰仔拗，都攏毋醒！無幾久，兩隻細猴仔手拂腳拂，橫架直架，佢个頭那、肚屎、手腳，歸身仔都分伊等踢交了！愛仰仔睡呢？不時也目陰目陽，一暗晡緊醒，目珠擘擘到天光。

一日過一日，細猴仔「手拂腳拂、手踢腳踢」緊來緊多擺，緊來緊大力，佢這隻「分人打歸暗晡無睡還盡暢」个慧阿姆，多謝天公保庇細人仔身體砸礮康健得人惜，細人仔好，佢就盡滿足，像著著頭獎樣，麼个都無求了。

【分佢个心肝仔一封信仔】

阿杰：

想著開學个第一日，佢愁暑假放了恁久，你荒了恁久，愛仰仔去讀書？故所，朝晨搓牙齒、洗面過後，就搶快分你食「利他能」个藥仔，望你上課「注意力集中，毋會打人」。毋過，藥仔蓋像無效，食夜時節，先生打電話來：

「下晝帶學生仔出去參觀，阿杰盡行啊頭前，喊都喊無應，一下仔就對著頭前行過來个人呷口涎，該人譴到會死：『先生，伊係若學生仔喔？伊呷佢口涎!』佢搶快喊阿杰同伊失禮。毋故，伊還盡譴，緊行還緊翻頭視佢兜……。」先生還講著朝晨，你無正無經，打同學个頭那、呷口涎，發下來个新書，自己翻了三遍都講無美術課本，先生特別去辦公室拿來，同學就發現你个美術課本又多出一本……佢面坲坲，無知愛仰仔同先生應話……。

佢每日同你講、若爸每日罵你，毋故，講過个話一下子就分雲吹走了。不時叫無幾久，你就開始唱歌仔，嘻嘻哈哈了。看你恁無記才，佢同若爸毋知愛叫也愛噓，想愛扭來

扇扇啊分你痛仔暢，看你叫哇恁衰過，想著你又毋係故意个，愛樣仔打？每日在學校，你爍爍惱跳，顛顛癡癡，不時分先生喝、分先生罰，同學也會糟蹋你，一多仔清苦，你愛自家忍、自家過，毋曉得同人講，你定著乜想分人說、分人惜啊！

阿杰！阿姆知你毋係故意个，有時節你感覺著無聊，想愛「呷口涎」去嚇人，錫人看；有時節你爬上去樓頂丟沙仔下來，想看沙仔樣仔跌下來，無顧別人，無注意自家危險；有一擺先生用粉筆丟你个桌子，喊你上課愛認真，你盡「大膽」，拈起來又丟分老師，續分先生誤會你「拿粉筆丟先生」，其實你係想丟還先生啊……。你真實毋係大家人講个係一個「鱸鰻頭」哇！

阿杰，你係阿姆个心肝仔，阿姆看到你蓋多好點，你性情溫和、毋會記仇、每日笑微微仔、盡大概、唱歌仔聲色盡亮、頭腦盡好、盡好看書、每日精神盡好……。就像蠕毛蟲變揚葉仔，時期到了，佢相信你也會變成一隻花喇畢剝，在日頭下飛來飛去，跳舞跳哇盡靚盡暢个揚葉仔。

阿姆深深祝福你！

永遠都會照顧你、愛你个阿姆

用這篇文章來紀念過身十過年，還分佢每日會想起來个阿姆，你在天堂愛同佢在地泥項共樣恁歡喜喲！你也放心，毋管堵著麼个困難，佢會學你用硬頸打拚个精神照顧大細，一直到伊等大！

創 作 理 念

「養兒方知父母恩」、「養兒方知父母心」、「養兒方知親子情」。筆者長子正是「ADHD」兒童（注意力不集中過動症），成長之路，異常艱辛；加以從事國民教育工作，教導各種身心障礙或問題家庭孩童，接觸心力交瘁的父母或缺乏妥適照顧的孩童，常令我心有戚戚。

感謝犬子帶予我不同視野，讓我照見自己的不足，也看到自己的幸福，體悟父母與教師工作的神聖與責無旁貸。疲倦時，我告訴自己：「烏雲背後總是青天」，長夜將近，黎明就要來臨！

鍾美琪

高雄市福康國民小學教師

